

Gij Gingjsaek Gyaeu Diuz Roen Neix

这一路的美景

□ Bouxsij Cinz Veij Bouxhoiz Lij Yanghlenz

《Fungsanh Yen Ceiq》geiqsij, Cingciuz Gvanghsi sam bi (bi 1877) Fungsanh Bouxhek (Bouxgun) Bouxdoj (Bouxcuengh) cengnauh, nauh le haujlai nanz, song baih cungj miz vunz siengdai, doeklaeng ginggvaq diuzgaij, cij ndaej bingzdingh. Dwkdaengz Cunghvaz Yinzminz Gunghozgoz laebbaenz, Bouxcuengh、Bouxgun、Yauzczuz Fungsanh Yen daengj minzczuz baedauq cij hainduj cingqciengz, gyoengqvunz doxaeu, giet baenz lauxdoengz, doxhuz caemhyouq, caencingq saedyienh minzczuz daih yungzhab daih doxgiet.

Gou couh youq ndaw yienhsingz Fungsanh hwnjban, daj ranz daengz danhvei caenh miz goengleix gyae, gou ciengzseiz byaij roen bae hwnjban. Byaij youq gwnz roen, gou ciengzciengz yawjraen vunz lai gak minzczuz Fungsanh doxhuz caemhyouq, gig rauejsim.

Bi 2019, Fungsanh daengx yienh ndaej duet mauhgunz liux. “Cienzmienh guhbaenz aen biengz siujgangh, aen minzczuz ndeu cungj mbouj ndaej noix” gij vahsenhconz yienhda neix couh venj youq gwnz Giuznazmaj ndawyienh, gig saenqhwnj sim vunz. Youq Fungsanh aen singz iq neix, diuz Giuznazmaj dwg gij cotsim roenloh, ngoenznaengz gou cungj byaij gvaq diuz giuz neix. Baihgwnz Dahgyauzyinh con bya ndonj gamj riuzvakvak, henzhamq geij godauz va hai hoengzgywgywg, caeuq “rinyungz daih’ it, aen singz conghgamj” geij cihsaw hung gaek youq gwnz dat Conhlungznganz

lwenqmyanzmyanz haenx doxcuq; baihlaj, roegraemx guh’ angq, raemxnywj mwncup; gizgyae, gij fwj hausak lumj faiq geujheux Byavwnzbiz、Yayungzbauj, aen singz bya iq gyaeundeix

youh hainduj ngoenz moq ndeu.

Gvaq Giuznazmaj couhdwg diuz Daihloh Yangzgvanh, henzdah ndaem miz gomanghgoj caeuq goreiz, heusausau、mwncupcup, dangj dwk seiqhenz raemhfwdwd. Vunz lai maij youq neix youzbyaij、doiqfwen、guh’ angq. Daegbied dwg seizhah, haetromh vunz lai couh naengh rim laj gofaex lo. Gizneix bang ndeu, gizhaenx bang ndeu, singfwen giz hwnj giz roengz. Canghfwen Bouxgun、Bouxcuengh、Yauzczuz ndawbiengz doxcomz youq itheij, gyoengqde haujlai cungj rox gangj geij cungj vah minzczuz, ndaej aeu vah mbouj doengz bae doiqfwen. Mboujguenj dwg “dih va’ ngaex” Bouxgun, roxnaeuz dwg “nizhahliuh” Bouxcuengh, roxnaeuz dwg “saivahbing” Yauzczuz, gij diuh fwen yenzswngldai neix rwenzru ndeidingq, baezbaez byaij gvaq, gou cungj dingq dwk simmaez bae.

Aen siujgih gou youq haenx, baiz monzmienh laj laeuz miz “Aen Diemq Buh Minzczuz Cangmeij”. Aen de cienmonz gai gij ndangdaenj minzczuz aeu baengzdoj bonjdieg guh baenz he, mehlauxbanj dwg boux lauxsae ngamq duiyouh ndeu. Hwnjban roengzban byaij gvaq, gou ciengzseiz dingqnyi de caij aen cibuh yienghdazdaz. Miz baez ndeu, de caeuq gou naeuz, gij doz raiz laiyienh gwnz ndangdaenj minzczuz, geiq miz lizsij vwnzva、fungsug sibgvenq、ginglig ndwenngoengz gak minzczuz, couh lumj “dae minzczuz lizsij youq gwnz ndang” nei, de gig siengj ciepcienz ndei gij dinfwngz cienzdoengj neix. De lij naeuz, gij buh iq、haizva、gaendukgyaeuj Bouxgun Bouxcuengh daengj yied daeuj yied doxlumj lo, cij miz ndangdaenj Yauzromj lij ce gij yienghsik daegbied gyaeundeix de. Gou ciengzseiz yawjraen baenzgyoengq mehbaj youq ndawdiemq de langhbaij buhvaq minzczuz, lij dangciengz ciengq geij coenz fwen, ingj doujyinh cienz hwnj gwnzvjangj bae, sim’ angq dangqmaz.

Gaxgonq, mwh bae hwnjban, gwnzgai



vunz baebae dauqdauq, ciengzseiz ndaej dingqnyi gij Vahgun bonjdieg yaem naekgywg, Vah Yauzczuz sing daemqdet unqnem, Vahcuengh daiq sing deihfueg. Gaenriengz Vahbujdungh bujgiz, seizneix gwnz gai Fungsanh, gyoengqvunz cungj gangj Vahbujdungh liux, lienz goenglaux mehlaux caet betcib bi haenx cungj aeu Vahbujdungh caeuq lwgnyez gangjvah. Neix cungfaen daejyienh le gak minzczuz baedauq doxgyau doxyungz, vahgangj caemh doxyungz hwngfat.

Seizneix Fungsanh miz haujlai gyaranz cungj dwg lai aen minzczuz gapbaenz, lumj daeggo doengzdangz gyae gou, daxboh de dwg Bouxcuengh, daxmeh de dwg Bouxgun, mehyah de dwg Yauzczuz, lwgbawx de dwg Mulauzczuz, hoeng ranz de cungj doxhuz doxndeix, vuenyungz raixcaix.

